

Celebracion Dia di Betico

Manifestacion cultural colorido riba Plaza Libertador Betico Croes



CU presentacion di un cantidad di grupo di baile y cu musica a celebra Dia di Betico e aña aki riba e plasa dedica na su nomber. Mey-mey di un publico grandi cu a bin pa aprecia nos cultura, sea ta atravez di musica, baile, artesanía of nos cuminda crioyo, e presentenan sin duda a disfruta di un evento cultural masha bon hinca den otro.

Mester bisa cu ta pa prome biaha cu riba un Dia Nacional, manera Dia di Betico, e organisadornan a trece otro tipo di grupo riba escenario, cu nunca anteriormente a haya e oportunidad aki.

E anochi a habri cu discurso di Minister di Cultura, sra. Michelle Hooyboer-Winklaar, sigui pa presentacion di un grupo di Gospel. E miembronan di Special Olympics Aruba a presenta dos baile tipico.

E grupo aki definitivamente a sa di horta curazon di tur presente, specialmente pasobra nan ta den pleno preparacion

pa representa Aruba na Grecia proximamente. Banda di nan trainingnan deportivo, nan a sa di traha tempo pa por prepara pa por presenta dos baile tipico riba escenario.

Scol di Baile Diana Antoinette a haci un bunita presentacion, sigui pa Tipico Cadushi Largo, den cual henter un famia ta forma parti di dje. E hoben cantante Hilly-Ann Croes (Reina di Dande) a habri e anochi interpretando nos Himno Nacional y na final a interpreta e cancion "Abo so" di Padu del Caribe bao yen di aplauso di e publico presente.

Otro grupo tipico cu a duna su presentacion ta Grupo Macuarima, cu tambe ta forma pa un grupo di famia, bao encargo di famia Rincones a sigui deleita e publico cu musica te cu 11or di anochi.

Di e forma aki Aruba a bini hunto pa brinda honor y respet na un di nos baluartenan den nos historia.